

SÎRÎRÎ KAARETA PAULO NÎMENUKA'PÎ COLOSSOS PONKON PIA

Atarakkannîto' yewî' ta Paulo wanî yai, sîrîrî kaareta menuka'pîiya. Moropai innape Jesus ku'nenan Colosse ponkon pia yarima'pîiya. Maasa pra inkamoro yenku'tî tiaronkonya etasa' tûya ye'nen. Tiaron to' nîkupî ton ekaremekî'pî to'ya Paapa yapurîto'pe to'ya. Mîrîrî ye'nen Pauloya to' panama, tiaron tînkupîkon ton yapisî to'ya namai, maasa pra Jesus wanî to' pia, aasîrî mîîkîrî neken, tiaron yu'se pra awanî.

1 ¹Uurî Paulo, Jesus Cristo naipontî'pî pe wanî, itu'se Paapa wanî ye'nen. Uyonpakon Timóteo yarakkîrî wanî sîrîrî.

²Sîrîrî kaareta menukauya sîrîrî aapia'nîkon, Paapa nîmo'ka'san tîmîrî ton pe, Colossos cidaderî ponkon pia. Amîrî'nîkon innape Jesus Cristo kupî pî' tîîko'mansenon pia yarimauya sîrîrî.

Manni' epe'mîra Paapa Uyunkon nîtîrî morî aapia'nîkon, moropai tîwanmîra awe'to'kon ton tîrîiya yu'se wai aapia'nîkon.

Paulo Epîremato'

³Apona'nîkon anna epîrema kaisarî, Paapa, Uyepotorîkon Jesus Cristo yun, yapurî pî' anna man tîwîrî, ⁴maasa pra innape Jesus Cristo ku'sa'ya'nîkon wenai moropai tamî'nawîronkon Paapa pemonkonoyamî' sa'namaya'nîkon ye'nen. ⁵Sîrîrî kupîya'nîkon maasa pra epu'tîya'nîkon, tîntîrî pe, Paapa nîkoneka'pî ka' po yapisîya'nîkon kupî sîrîrî. Mîrîrî nîmîkî pî' aako'mamîkon, sîrîrî e'pîika'tînto' yekare, yairon pu'kuru eta'pîya'nîkon pata pai. ⁶Itekare etaya'nîkon yai, mîrîrî yapisî'pîya'nîkon moropai innape awanî epu'tî'pîya'nîkon. Mîrîrî warantî nîrî ekaremekî to'ya tiaronkon pî' tamî'nawîrî pata po. Moropai innape ikupî to'ya. Mîrîrî warantî inî' panpî' pemonkonyamî' e'pîika'tî'pî, amîrî'nîkon e'pîika'tî'pî warantî, epe'mîra Paapa nîtîrî'pî yapisîya'nîkon yai. ⁷Sîrîrî itekare eta'pîya'nîkon uyonpakon Epafras winîpai. Mîîkîrî wanî teesenyaka'masen pe anna pokonpe Cristo ton pe. Mîrîrî pî' teesenyaka'ma pî' aako'mamî amîrî'nîkon ton pe. ⁸Mîîkîrîya, î' kai'ma

amírî'nîkon e'sa'namato' ton tîsa' Morî Yekaton Wannîya aapia'nîkon, ekaremekî'pî anna pî'.

⁹Mírîrî ye'nen tîwîrî esatî pî' anna ko'mamî Paapa pî' amírî'nîkon ton pe. Ayekarekon eta'pî annaya pata pai, esatî annaya Paapa pî', aapia'nîkon epu'nen tîto'peiya, itu'se tîwe'to' epu'tîkonpa. Moropai tamî'nawîrî Morî Yekaton Wannîya itirî epu'tîkonpa. ¹⁰Mírîrî wenai amírî'nîkonya epu'tî, î' kai'ma Uyepotorîkon e'to' itu'se yawîrî aako'mamîkon, moropai tîwîrî ikupî pî' aako'mamîkonpa. Mírîrî warantî ikupî pî' aako'mamîkon ya, tamî'nawîrî morî pe ayaserukon esera'ma moropai Paapa yeseru yai epu'nen pe panpî' awanîkon. ¹¹Moropai Paapa pî' esatî annaya, tamî'nawîrî meruntî ke awanîkonpa imeruntîri ya'. Mírîrî Paapa meruntîri wanî tamî'nawîronkon meruntîri yentai. Mírîrî wenai tamî'nawîrî apona'nîkon tui'sen yapîtanîpîkonpa teekore'mai pra, ¹²moropai “Morî pe man” taakonpa taatausinpai, mírîrî esatî pî' anna man Paapa pî'. Maasa pra amírî'nîkon ku'sai'ya tarîpai tîpemonkono pe, tîpia aako'mamîkonpa a'ka ya'. ¹³Mîîkîrîya uurî'nîkon mo'ka'pî Makui winîpai, ewaron ta ko'mannî tanne. Moropai uurî'nîkon enepî'pîiya tînmu, tînapurî'pî pia, uyesa'kon pe awe'to'pe. ¹⁴Mîîkîrî tînmu sa'mantasa' ke, imakui'pî unkupî'pîkon ye'ma'pîiya moropai tîwanmîra ikupî'pîiya.

Paapa Yenponen Pe Cristo Wanî

¹⁵Cristo wanî î' kai'ma Paapa wanî yenponen pe, manni' Paapa, teesera'masen pepîn, yenponen pe. Ipîkku pe pu'kuru mîîkîrî wanî inmu pe, tamî'nawîronkon inkoneka'pî yentai.

¹⁶Maasa pra mîîkîrîya tamî'nawîron koneka'pî ka' po moropai sîrîrî non po. Teesera'masen koneka'pîiya, moropai teesera'masen pepîn koneka'pîiya. Inkamoro kore'ta tamî'nawîronkon inserîyamî' koneka'pîiya, moropai manni'kan ipîkkukon yepuru ton inserîyamî' koneka'pîiya. Mîîkîrîya ikupî'pî tîmîrî ton pe, kure'ne tamî'nawîronkonya tapurîto'pe.

¹⁷Tamî'nawîron kupî tîuya rawîrî Cristo wanî'pî. Moropai tamî'nawîron ko'mannîpî pî' aako'mamî sîrîrî itu'se tîwanî yawîrî tîma'tanî'se pra.

¹⁸Pemonkon esa' yaipontî pî' ipu'pai ko'mamî manni' warantî, mîîkîrîya innape tîku'nenan yaipontî ko'mannîpî sîrîrî. Mîîkîrî wanî ko'mannîto' esa' pe tîwe'sen pe.

Mîîkîrî e'mî'sa'ka'pî e'mai' pe isa'manta'san rawîrî, ipîkku pe tîwanîpa tamî'nawîronkon yentai. ¹⁹Î' kai'ma Paapa wanî yenponen pe awanî,

maasa pra Paapa pe pu'kuru awanî mîito'pe, itu'se Paapa e'to' yawîrî. ²⁰Mîrîrî ye'nen mîîkîrî tînmu wenai Paapaya tamî'nawîron tînkoneka'san mana'po yu'se awanî'pî tîpia. Tarîpai mîîkîrî Paapa enasa' man morî pe pemonkonyamî' yarakkîrî. Maasa pra tînmu mîni' eti'kamo'pî pakî'nan po aasa'manta yai. Mîrîrî wenai tamî'nawîronkon tînkoneka'san mana'po'pîiya tîpia sîrîrî non po tîwe'sanon moropai ka' po tîwe'sanon mana'po'pîiya.

²¹Pena amîrî'nîkon ko'mamî'pî aminke Paapa pî'. Paapa yeyaton pe awanî'pikon. Maasa pra imakui'pî ankupîkon ko'mannîpî wenai moropai imakui'pî eesenumenkato'kon wenai. ²²Tîise tînmu sa'mantato' wenai amîrî'nîkon kupî'pî Paapaya tîwakîri pe, amîrî'nîkon yarîpa tîpia, morî pe imakui'pî ton pra. Mîrîrî yai anî'ya taa eserike pra awanî: —Imakui'pî mîîkîrî —taiya pepîn. ²³Mîrîrî kupîiya, tîise innape ikupî pî' aako'mamîkon e'pai awanî, teeseta'kai pra. Mîîkîrî nîmîkî pî' aako'mamîkon, manni' itekare aneta'pîkon wenai. Manni' eta pî' tamî'nawîronkon ko'mamî, mîrîrî itekare ekareme'nen pe uurî Paulo enasa' sîrîrî.

Paulo Esenyaka'mato'
Innape Jesus Ku'nenan Ton Pe

²⁴Atausinpan pî' wai e'taruma'tîto' pî' amîrî'nîkon wenai. Maasa pra Cristo e'taruma'tî'pî warantî, e'taruma'tî ko'mannîpî, unku'pî ton pe inekaremekî'pî yawîrî. Ipemonkonoyamî' ton pe, inmo'ka'san ton pe e'taruma'tî sîrîrî. Inkamoro, inmo'ka'san wanî itesa' warantî, iwaikkato' pe to' wanî. ²⁵Moropai mîrîrî warantî e'taruma'tî, maasa pra Paapaya uku'sa' sîrîrî Jesus nîmo'ka'san poitîrî pe. Mîrîrî tîrî'pîiya unkonekaton pe amîrî'nîkon pîika'tîton pe, ²⁶mîrîrî tamî'nawîrî tîmaimu ekaremekî pî' uuko'manto'pe. Sîrîrî itekare inonomî'pî, tamî'nawîronkon nepu'tî'pî pepîn. Mîrîrî yenposai'ya sîrîrî tîpemonkonoyamî' pia. ²⁷Mîrîrî yenko tîuya ta'pîiya, see warantî ipemonkonoyamî'ya mîrîrî esenomî'pî epu'to'pe kai'ma. Mîrîrî tîrî'pîiya tamî'nawîronkon pemonkonyamî' pia, Judeuyamî' pia neken pra. Pena anî' nepu'tî pepîn mîrîrî Cristo ko'mamî tamî'nawîronkon tîpemonkonoyamî' ya'. Mîrîrî wenai morî pu'kuru yapisîya'nîkon Paapa winîpai epu'tîya'nîkon.

²⁸Sîrîrî warantî Cristo yekare ekaremekîuya tamî'nawîronkon pî'. Tamî'nawîrî epu'nen pe e'to' ke apanamauya'nîkon, moropai ayenupauya'nîkon tiwin pî' awanîkon tanne, Cristo piawonkon pe awanîkonpa, tamî'nawîrî morî pe awanîkonpa e'to' yawîrî, Paapa pia amîrî'nîkon yempouya yai. ²⁹Mîrîrî yaino ton pe esenyaka'ma ko'mannîpî sîrîrî. Umoron epu'tîuya ko'mannîpî sîrîrî tîise Cristo nîtîrî'pî umeruntîri pe, mîrîrî ke esenyaka'ma sîrîrî.

2 ¹Teeseka'nunkai uurî esenyaka'ma amîrî'nîkon ton pe epu'tîya'nîkon yu'se wai. Paapa maimu ekaremekî pî' uuko'mamî

tíwe'taruma'tíi. Moropai manni'kan Laodicéia ponkon tonpe, moropai tamí'nawíronkon tiaronkon uyera'matíponkon pepín tonpe esenyaka'ma. ²Epírema ko'mannípí inkamoro ko'manto'pe meruntí ke taatausinpai moropai inkamoro ko'manto'pe tíwe'sa'namai tonpakon yarakkírí. Moropai Cristo yekare, pena aní' nepu'tí pepín, Paapa winípainon tepu'se to' ko'manto'pe innape, míikírí epu'to'pe to'ya yairí. Míikírí, Paapa winípainon waní Cristo pe. Mírírí warantí Paapa pí' esatí pí' uuko'mamí apona'níkon. ³Maasa pra míikírí Cristo neken waní Paapa winípainon, aní' nepu'tí pepín epu'tíya'níkon emapu'tínen pe. Paapa nepu'tí epu'tíya'níkon emapu'tíya. Maasa pra míikírí ton pra si'ma mírírí epu'tíya'níkon eseríke pra awaní. ⁴Mírírí ye'nen tauya sírírí amírí'níkon pí', tiaron seru'ye' erepansa' pí' akore'ta'níkon, míikírí eseuríma, morí pe míikírí maimu pí' eesenku'tíkon namai. ⁵Maasa pra uurí waní sírírí aminke apí'níkon. Tíise esenumenkato' ya' amírí'níkon pokonpe eseporí. Moropai kure'ne atausinpan pí' wai morí pe aako'mamíkon pí', moropai innape Cristo kupí pí' aako'mamíkon yekare etauya pí'.

Cristo Yarakkírí Ko'manníto'

⁶Í kai'ma Jesus yapisi'píya'níkon ayepotoríkon pe? Innape ikupí'píya'níkon. Mírírí warantí yarakkírí ako'mantí. ⁷Ipona apítatí manni' yei apítasa' warantí manni' tíkara ke tíwaní ye'nen. Aako'manto'kon rumakatí iipia iní' panpí' meruntí ke awaníkonpa, innape ikupí pí' í' kai'ma eesenupa'píkon yawírí. Moropai —morí pe pu'kuru man, Paapa —taa pí' ako'mantí tíwírírí.

⁸Aka, epu'nenan pe tíwe'ku'sanon pemonkonyamí' maimu pí', teesenku'tíi pra e'tí. Maasa pra mírírí waní í' pe pra rí epu'nen pe to' e'to'. Pemonkonyamí'ya neken tenupato'kon pí' ayenupakon yu'se to' waní. Moropai sírírí pata po tíiko'mansenon esenumenkato' ke ayenupakon to'ya. Tíise mírírí waní pepín Cristoya yenupanto'pe. Inkamoroya ayenupakon pí' teesenku'tíi pra e'tí. ⁹Maasa pra tamí'nawírí í' kai'ma Paapa waní manni' warantí Cristo waní mírírí. Awaní Paapa pe tíise pemonkon pe eena'pí títun ke. ¹⁰Moropai amírí'níkonya aako'manto'kon yapisi'pí Paapa winípai, Cristo pemonkono pe awaníkon ye'nen. Í' ton pra awaníkon pepín, maasa pra míikírí, ayesa'kon waní tamí'nawíronkon inseríyamí', o'ma'kon, meruntíkon, nari'kon yentai. Moropai tamí'nawíronkon ka' po tíwe'sanon yentai awaní.

¹¹Pena amírí'níkon Judeuyamí' esenposa' yai, amerekon pí'pí pottí ya'tí'pí to'ya Paapa pemonkono pe awaníkonpa kai'ma. Mírírí warantí nírí títumonkono pe Cristoya amo'ka'píkon yai, imakui'pí anku'pai awe'to'kon mo'ka'píya imakui'pí kupíya'níkon namai. Míikírí Cristoya ikupí'pí, pemonkonya pra. ¹²Amírí'níkon esenpatakona yai, penaron imakui'pí ayaserukon yaretí'ka'píya'níkon. Maasa pra Cristo sa'mantasa' ya,

moropai eesu'na'tí'pí ya, amírí'níkon esu'na'tí'pí. Moropai Paapaya Cristo pímí'sa'kasa' yai, amírí'níkon pímí'sa'ka'píiya aako'mamíkonpa, innape meruntí ke Paapa waní kupí'píya'níkon ye'nen. ¹³Amírí'níkon waní'pí pena isa'manta'san warantí itu'se apunkon e'to' yawírí ikupí pí' aako'mamíkon ye'nen. Mírírí imakui'pí kupí'píya'níkon wenai isa'manta'san warantí awaní'píkon Paapa pemonkono pe pra. Tíise Paapaya Cristo pímí'sa'kasa' yai, amírí'níkon nírí pímí'sa'ka'píiya. Moropai ankupí'píkon imakui'pí kupí'píiya tamí'nawírí títwanmíra. ¹⁴Moropai uurí'níkon sa'mantato' yentai awaní'pí. Maasa pra Moisés nurí'tíya yenupanto'ya taasa' see warantí: —Aní'ya imakui'pí ku'sa' ya, míkírí sa'manta e'pai man —ta'píiya. Imakui'pí unku'pí'píkon wenai sa'mantan e'pai tíise yaretí'ka'pí Cristoya, iní' sa'mantan namai. Pakí'nan pona tíisa'manta yai, imakui'pí unku'pí'píkon ye'ma'píiya tamí'nawírí. ¹⁵Moropai pakí'nan pona tíisa'manta yai, Cristoya teeyatonon yuwa'ka'pí. Manni'kan o'ma'kon, uyaipontíkon pí' tííko'mansenon, meruntíkon, nari'kon, tamí'nawírí inkamoro meruntíri yuwa'ka'píiya. Inkamoro kupí'píiya tamí'nawíronkonya era'ma tanne, í' pe pra rí to' enato'pe. Mírírí warantí to' yentai Cristo ena'pí tíisa'manta'pí wenai.

¹⁶Mírírí ye'nen aní'ya taa ya apí'níkon, sararu yaníya'níkon ya, imakui'pí kupíya'níkon mírírí, taa to'ya. Moropai awukukon eníríya'níkon ya, imakui'pí pe nírí awaní. Moropai eesenyaka'makon ya, Paapa ton pe tíku'ne'títo' weiyu yai pra, moropai teera'tísen pe kapoi waní yai eesenyaka'makon ya, moropai erí'kanníto' weiyu yai eesenyaka'makon ya, imakui'pí pe awaní, taa to'ya. Inkamoro ye'kakon pínamaya'níkon e'pai pra man. ¹⁷Maasa pra pena, sírírí pí' Paapa eseuríma'pí seru' pepín, í' kai'ma Cristo iipí ekareme'to'peiya. Tarípai Cristo iipí'pí. Mírírí ye'nen míkírí neken yapurípai'níkon, manni' aaipí ekareme'nenan tapurí pra. ¹⁸Tiaronkonya ayenupakon yairí pra kí'títí. Tíwe'ne' títnera'ma'píkon pí' ayenupakon to'ya ya, típínamai pra e'tí. Taa to'ya apí'níkon amírí'níkon teka'nunkai amírí'níkon anenupapai to' waní inseríyamí' yapuríkonpa kai'ma. Moropai tepu'se awe'taruma'tíkon yu'se to' waní. Teesenupa'píkon pí' míí pe to' waní teuren. Tíise inkamoro ye'kakonya ayenupato'kon típínamai pra e'tí. Maasa pra pemonkon esenumenkato' waní warantí to' esenumenka. ¹⁹Inkamoro ye'kakon waní pepín Cristo pemonkono pe. Maasa pra Cristo waní pepín to' pu'pai pe. Upu'paikon winípai tamí'nawírí uyesa'kon waní e'waikkatoí pe, típun ke. Mírírí warantí nírí Cristo meruntíri winípai uurí'níkon ipemonkonoyamí' waní tiwin. Moropai uurí'níkon ko'manní'pí Cristoya iní' panpí' epanníto'pe moropai epu'to'pe itu'se Paapa e'to' yawírí. [Tíise inkamoro seru'ye'kon atarima Cristo piapai.]

Sa'mantan Típo Cristo Yarakkírí Ko'manní

²⁰Cristo pemonkono pe awaníkon ye'nen aasa'mantasa' yai, amírí'níkon sa'manta'pí ayeserukon winípai. Mírírí ye'nen iní'rí inkamoro sírírí pata

po tîiko'mansenon meruntîkon amîrî'nîkon yaipontî pî' tîiko'mansenonya ayaipontîkon eserîke pra awanî. Tîise î' ton pe mîrîrî ye'ka warayo'kon maimu yawîrî iko'manpai awanîkon? Inkamoro pemonkono pe awanîkon pepîn. ²¹Taa to'ya apî'nîkon mîrîrî ye'ka kîsapi'tî. Moropai mîrîrî ye'ka kîsena'tî, mîrîrî ye'ka tappî pra e'tî, taa to'ya apî'nîkon. ²²Tîise mîrîrî ye'kakon wanî ipatîkarî tîiko'mansenon pepîn. Taataretî'kasen pe mîrîrîkon wanî. Mîrîrî ye'nen —Mîrîrî ye'ka kîsapi'tî, mîrîrî ye'ka kîsena'tî —taa to'ya ya, î' pe pra rî awanî. Maasa pra mai pe neken awanî ye'nen, warayo'konya yenupanto'pe neken awanî ye'nen. ²³Mîrîrî ye'nen yai pra mîrîrî taa to'ya wanî, mîrîrî kîsapi'tî, moropai mîrîrî kîsena'tî, moropai mîrîrî kîsapi'tî, moropai inseriyamî' yapurî e'pai man, moropai tepu'se amoronkon epu'tiya'nîkon e'pai man, taa to'ya wanî epu'nen pe kai'ma. Tîise mîrîrî ye'kaya imakui'pî anku'pai esenumenkanto' yuwatî eserîke pra awanî.

3 ¹Amîrî'nîkon e'mî'sa'ka'san Cristo yarakkîrî, penaron ayeserukon rî'pî winîpai. Mîrîrî ye'nen ka' pon yu'se e'tî, o'non pata Cristo ereutasá' manni' Paapa meruntîri winî. ²Cristo winîpainon pî' neken esenumenkati, inî'rî tarîron yeseru pî' teesenumenkai pra. ³Maasa pra tarîron yeseru pî' isa'manta'san warantî awanîkon. Tarîpai aako'manto'kon wanî Cristo yarakkîrî. Moropai Cristo ko'mamî Paapa yarakkîrî. Mîrîrî ye'nen aako'manto'kon era'ma anî'ya pepîn. ⁴Tîise î' pensa Cristo iipî yai, tamî'nawîronkonya era'ma. Morî pe pu'kuru aai'pî era'ma to'ya. Mîrîrî yai Cristo yarakkîrî amîrî'nîkon nîrî era'ma to'ya morî pe pu'kuru, Cristo wanî manni' warantî.

Uyeserukon Penaro' Moropai Amenan

⁵Imakui'pî kî'ku'tî, isa'manta'pî warantî e'tî, maasa pra imakui'pî kupî pî' isa'manta'pî ko'mamî pepîn. Mîrîrî warantî e'tî. Pena awanî'pîkon see warantî: Se' tapairî wîri'sanyamî' yarakkîrî warayo'kon wanî, tîno'pîkon pepîn yarakkîrî. Moropai wîri'sanyamî' nîrî wanî warayo'kon yarakkîrî, tînyokon pepîn. Moropai tiaron nura kupî pî' warayo'kon ko'mamî imakui'pî pe teesenumenkato'kon yawîrî. Moropai kure'ne î' yu'se eesenumenkakon ko'mannîpî ayemannekon ton. Mîrîrî ayemannekon neken anapurîpai awanîkon Paapa tapurîi pra, manni'kan mia' ke ikonekasa' yapurînenan warantî. Mîrîrî ye'nen isa'manta'pî warantî e'tî, mîrîrî ye'kakon yapurîya'nîkon namai, imakui'pî anku'pai awanîkon namai. ⁶Maasa pra mîrîrî ye'ka kupî pî' tîiko'mansenon taruma'tî Paapaya kupî sîrîrî. ⁷Pena amîrî'nîkon ko'manpî'tî'pî mîrîrî imakui'pî kupî pî'. Maasa pra penaron ayeserukon pî' aako'manpî'tî'pîkon.

⁸Tarîpai tamî'nawîrî mîrîrîkon rumakatî. Eekore'mato'kon mararî pra teekore'mai awe'to'kon tiaronkon yarakkîrî rumakatî. Ayewanmakon pe tiaronkon ku'to'ya'nîkon rumakatî. Moropai anî'rî eseurîma e'pai pra man tiaron winîkîi imakui'pî pe. Mîrîrî ye'ka nura pî' teeseurîmai pra

e'tî. ⁹Seru'ye' tiaronkon pî' tîwe'se pra e'tî. Maasa pra amîrî'nîkonya penaron ayaserukon rî'pî rumaka'pî. Tamî'nawîrî imakui'pî ankupî'pîkon rumaka'pîya'nîkon. ¹⁰Moropai amenan ayaserukon ton yapisi'pîya'nîkon ayewankon ya'. Moropai morî pe amîrî'nîkon kupî pî' Paapa ko'mamî sîrîrî, tîwarantî amîrî'nîkon e'to'pe kai'ma, moropai tamî'nawîrî tepu'tikonpa. ¹¹Mîrîrî warantî amenan pe awanîkon ye'nen Judeu pe awanîkon ya, moropai Judeu pe pra awanîkon ya î' wani' awanî pepîn Paapa pia. Moropai amerekon pi'pîkon ya'tîsa' to'ya ya, ya'tîsa' to'ya pra awanî ya, î' wani' awanî pepîn Paapa pia. Moropai pakko pe awanîkon ya, moropai eranne' pe awanîkon ya, moropai to' poitîrîtonon pe awanîkon ya, moropai to' poitîrî pe pra awanîkon ya, î' wani' awanî pepîn Paapa pia. Tîise Cristo ko'mamî ya, ayewankon ya' mîrîrî neken wani ipîkku pe. Maasa pra tamî'nawîronkon uurî'nîkon yewan ya' Cristo ko'mamî.

¹²Paapa nîmenka'san pe awanîkon tîpemonkono pe. Morî pe tîwe'sanon pe awanîkon, insa'nama'san kure'ne. Mîrîrî ye'nen tiaronkon sa'namatî. Tiaronkon winîkîi morî ku'tî, moropai tiaronkon winîkîi mîi pe tîwe'se pra e'tî. Tîise eranmîra e'tî, moropai teekore'masen pe pra e'tî, î' rî etaya'nîkon pî'. ¹³Î' rî tiaronkon nîkupî awinîkîi'nîkon yapîtanî'tî, moropai î' ta'pî to'ya ku'tî aawanmîra'nîkon. Tîwanmîra Uyepotorîkonya ankupî'pîkon imakui'pî kupî'pî warantî iku'tî. ¹⁴Moropai mîrîrîkon tamî'nawîrî tauya manni' yentai tîwe'sa'mamai ako'mantî tiaronkon pokonpe. Maasa pra mîrîrî e'sa'namato' wenai, tamî'nawîrî morî pe aako'mamîkon tîmurukun pe.

¹⁵Tamî'nawîrî amîrî'nîkon wanî Cristo pemonkono pe, tiwin pî' awanîkon tîise. Paapaya amo'ka'pîkon morî pe aako'mamîkonpa tîmurukun pe. Mîrîrî ye'nen tîwanmîn Cristo winîpainon ko'manto'pe ayewankon ya' eturumakatî, ayaserukon epu'tikonpa. Moropai —Morî pe man, Paapa —taa pî' ako'mantî Paapa pî'. ¹⁶Moropai Cristo yekare epu'tî pî' aako'mamîkon yu'se wai inî' panpî' epu'nen pe awanîkonpa. Moropai tamî'nawîrî mîrîrî anepu'tikon ke tiaronkon yenupa pî' moropai to' panama pî' aako'mamîkon yu'se wai. Eserenkatî Paapa maimu e'menukasa' erenkato' pî' moropai Paapa yapurîto' pî'. Moropai Jesus yeseru pî' teeseurîmasen eren pî' eserenkatî, Paapa yapurî pe. —Morî pe pu'kuru man Paapa —kai'ma eserenkatî. ¹⁷Mîrîrî tamî'nawîrî ikupîya'nîkon manni' moropai î' taaya'nîkon manni' warantî, iku'tî Uyepotorîkon Jesus maimu pe. Moropai ka'tî Paapa pî': —Jesus Cristo wenai anna piika'tîsa'ya nai morî pe —ka'tî Paapa pî'.

Î' Kai'ma Ko'mannî Amenan Uyeserukon Yarakkîrî

¹⁸Tarîpai wîri'sanyamî' tînyo kenankon panamauya sîrîrî. Anyokon maimu yawîrî tîwe'sen pe e'tî, wîri'sanyamî'. Mîrîrî warantî ikupîya'nîkon e'pai awanî, maasa pra mîrîrî yu'se Uyepotorîkon wanî ye'nen.

¹⁹Moropai warayo'kon tîno'pî kenankon panamauya sîrîrî. Ano'pîkon sa'namatî. To' ekore'mato' ton tepose pra morî pe e'tî to' yarakkîrî.

²⁰Tarîpai moreyamî' panamauya sîrîrî Cristo pemonkono pe si'ma ankupîkon ton pî'. Ayunkon moropai asankon maimu yawîrî iku'tî. Î' taasa' to'ya ya, to' maimu yawîrî iku'tî. Maasa pra mîrîrî warantî ikupîya'nîkon ya, Paapa ka' pon wakîri pe awanî.

²¹Tarîpai amîrî'nîkon to' yunkonyamî' panamauya sîrîrî. Imakui'pî anmukukon nîkupî yako'menkaya'nîkon yai, inkamoro tekatonkai pra e'tî, tîise to' pîika'tîya'nîkon yuwatî, to' esewankono'ma namai.

²²Tarîpai amîrî'nîkon tîkaraiwarî kenankon panamauya sîrîrî. Akaraiwarîkon maimu yawîrî e'tî tamî'nawîron ankupîkon pî'. —Uyera'maiya ye'nen ikupîuya aatausinpatope —kai'ma, teesenumenkai pra. Tîise imaimu yawîrî iku'tî ayera'maiya'nîkon pra tîise. Cristo pemonkono pe awanîkon ye'nen, yairî iku'tî. Maasa pra mîîkîrî namaya'nîkon ye'nen. ²³Tamî'nawîron î' rî ankupîkon kupîya'nîkon ya, iku'tî taatausinpai pu'kuru. Morî pe esenyaka'matî Uyepotorîkon ton pe, warayo'kon ton pe pra neken. ²⁴Maasa pra Uyepotorîkonya arepakon kupî epu'tîya'nîkon. Tîpemonkonoyamî' pia itîrî tîuya ta'pî tîuya pantakaiya yai yapîsîya'nîkon kupî sîrîrî. Maasa pra Uyepotorîkon pe Cristo wanî ye'nen, mîîkîrî ton pe eesenyaka'makon mîrîrî. ²⁵Moropai manni'kan imakui'pî kupîtîponkon pemonkonyamî' tepu'se pra, inkamoro repaiya kupî sîrîrî e'taruma'tîto' ke, to' nîkupî'pî wenai. Maasa pra Paapaya tiaronkon yuwa'ka pepîn, tîise tamî'nawîrî to' taruma'tîiia.

4 ¹Tarîpai manni'kan tîpoitîrî kenankon panamauya sîrîrî. Yairî e'tî apoitîrîkon pî', morî pe to' konekaya'nîkon yuwatî. Maasa pra moro man ayepotorîkon ton ka' po. Mîîkîrîya ayera'makon.

Panamanto'

²Ako'mantî tîwîrî eepîremakon pî'. Moropai î' kai'ma taaya'nîkon, manni' amaimukon pî' teesenumenkai epîrematî. Morî pe man Paapa, ka'tî eepîremato'kon ya'. ³Moropai eepîremakon ya, anna pona epîrematî. Paapaya tîmaimu ekaremekî annaya pata'se' ton tîtîto'pe. Moropai Cristo yekare, sîrîrî tîpose anî' nepu'tî pepîn ekareme'to'pe annaya epîrematî. Mîrîrî wenai uurî wanî sîrîrî tarî atarakkannîto' ta. ⁴Mîrîrî ye'nen epîrematî uurîya Cristo yekare ekareme'to'pe aronne panpî', morî pe epu'to'pe to'ya. Mîrîrî warantî ekaremekîuya e'pai awanî mîrîrî. ⁵Amîrî'nîkon nîrî tepu'se awanîkon e'pai man manni'kan Paapa epu'nenan pepîn yarakkîrî eeseurîmakon ya. Moropai Cristo yekare ekaremekî yuwatî, to' yarakkîrî eeseurîmakon kaisarî. ⁶Tiaronkon yarakkîrî eeseurîmakon ya, morî pe eseurîmatî, inî' panpî' amaimukon anetapai to' e'to'pe. Moropai inkamoro eseurîma yai, yairî to' maimu yuuku epu'tîya'nîkon yu'se wai.

Tiwinkano'pî Pe Paulo Esekareme'to'

⁷Uyompokon, uwakîrikon pu'kuru Tíquico, esenyaka'ma'pî yairî pu'kuru uyarakkîrî, Uyepotorîkon esenyaka'mato' pî'. Mîîkîrîya

tamî'nawîrî amîrî'nîkon pî' uyekare ekaremekî. ⁸Mîîkîrî yarimauya sîrîrî akore'ta'nîkon ayausinpai'nîkon attîto'pe. Moropai tamî'nawîrî tarî anna ko'mamî ekareme'to'peiya, aatausinpakonpa. ⁹Mîîkîrî yarakkîrî Onésimo wîtî, manni' uwakîri moropai yairî tîwe'sen. Mîîkîrî wanî ayonpakon, akore'ta'nîkon tîîko'mansen pe. Inkamoroya tamî'nawîrî î' kai'ma tarî tîwe'ku'sen ekaremekî apî'nîkon.

¹⁰Tarîpai Aristarco, uyarakkîrî tîwe'sen atarakkannîto' ta, mîîkîrîya tîmaimu yarima sîrîrî aapia'nîkon. Moropai Marcos, Barnabé yakon manen, mîîkîrîya nîrî tîmaimu yarima. Mîîkîrî yekare epu'tî pî' naatîi akore'ta'nîkon tuutî pî' eesurîmasa'. Mîrîrî ye'nen aakore'ta'nîkon eerepamî yai morî pe mapi'tîi. ¹¹Moropai Josué manni' Justo kai'ma tesa'sen, mîîkîrîya nîrî tîmaimu yarima aapia'nîkon. Uyarakkîrî teesenyaka'masanon kore'ta insamoro neken wanî Judeuyamî' pe. Insamoroya kure'ne upîika'tî'pî, î' kai'ma tesa'kon pe Paapa wanî epu'to'pe pemonkonyamî'ya ekaremekî pî'. ¹²Moropai Epafras, manni' ayonpakon akore'ta'nîkon tîwe'sen, mîîkîrî wanî Jesus Cristo poitîrî pe. Mîîkîrîya nîrî tîmaimu yarima aapia'nîkon. Mîîkîrî epîrema ko'mannîpî. Paapa pî' esatî pî' aako'mamî kure'ne amîrî'nîkon ton pe. Esatîiya innape Paapa kupî pî' aako'mamîkonpa tîwîrî. Inî' panpî' epu'nen pe eenakonpa moropai î' taasa' Paapaya yawîrî ikupîkonpa kai'ma eepîrema ko'mannîpî. ¹³Epu'tî pî' wai mîîkîrî esenyaka'ma'pî yeseru. Sa'man kupî'pîiya amîrî'nîkon tonpe moropai Laodicéia ponkon moropai Hierápolis ponkon tonpe nîrî. Mîrîrî epu'tî pî' wai. ¹⁴Tarîpai uwakîrikon pu'kuru Lucas, manni' pri'yawonkon pepîn pî' teesenyaka'masenya, moropai Demasya nîrî tîmaimu yarima pî' man. ¹⁵Moropai umaimu yarima pî' wai uyonpakon Laodicéia ponkon pia, moropai Ninfa pia nîrî moropai manni'kan itewî' ta teeperepî'senon pia yarima pî' wai.

¹⁶Sîrîrî kaareta erenkasa'ya'nîkon tîpo, marimatîi Laodicéia ponkonya nîrî erenkato'pe. Moropai Laodicéia pona nîrî unarima'pî erenkaya'nîkon e'pai man.

¹⁷Moropai ka'tî Arquipo pî': —Ankupî pe Paapa nîtîrî'pî, mîrîrî kupî pî' ako'mankî morî pe, tamî'nawîrî yaretî'kaya pîkîrî —ka'tî ipî'.

¹⁸Tarîpai sîrîrî menukauya sîrîrî uyenya ke pu'kuru. Umaimu man aapia'nîkon. Aawanmîra'nîkon uurî kî'ku'tî tîise atarakkannîto' ta wanî pî' enpenatatî. Moropai tauya Paapa pî': —Morî pe to' pîremakî, Paapa —tauya.